




O LE SULU SAMOA



EKALESIA FAAPOTOPOTOGA KERISIANO SAMOA
O LE NUSIPEPA FAA-LE-LOTU NA FAAVAEINA I LE T.A. 1839



FAAVAEINA 1839

O LE SULU SAMOA

AOKUSO 2014

email: sulusamoa@cccs.org.ws -Main Office: Ph. 24414, Ext 30 - website: www.cccs.org.ws

O le Sao o Tina i le Aiga ma le Tala Lelei

Pepa mai le Mafutaga - Matagaluega
Apia Sasa'e - 17 Iulai 2014
saunia e

Jane Iona

EFKS Ta'elefaga - Fagalooa

Faatomuaga:

Fai mai le muagagana faapapalagi: "O le tina, o se veape ae le o se nauna." (Mother is a verb but not a

noun). O se muagagana oloo ta'u mai ai o le tina, o le upu ma le tagata galue, e faatino,

faagaoioi ma faataunuu; o le upu ma le tagata e ola, e auaua *faaauau itulau e 2*

Peresitene Bill Clinton ma le Sui Talavou Samoa



O le Ata: O se tasi sa avea ma Peresitene o le Malo o Amerika, Bill Clinton, ma se tasi o ta'ita'i o Autalavou EFKS a le Matagaluega a Manukau i Niu Sila, e faigaluega i *itulau e 7*

O le Faifeau

Pepa mai le Mafutaga Matagaluega
a Apia Sasa'e - 16-17 Iulai 2014
saunia e

Uele Lotu Uele FS

Vaiala

Mataio 10: 16: "Faauta ou te'a'au atu ia te outou e pei o mamoe i le va o luko. O lenei ia outou atamamai pei o gata, a ia fifilemu pei o lupe." *silasila itulau e 9*

O le Mafuaaga o le Pese:
God Be With You
"la faatasi pea lesu ma oe."

E tele lava ina tatou faalogo o fai mai se isi ia tatou: "Manuia le aso!" Mata e le manaia, mo *faaauau itulau e 8*

**'U'ulima ma
Milimili**

Toetoe lava a ma le iloa le sau o le teine ma tuu a ma ipu meai i luga o le laulau, lea ma te nonofo ai i se tulimanu o se *silasila itulau e 14*

**E le'i faia le Matuu mulimuli
Hiroshima:**

O le aso 6 Aokuso 1945, na faapaina ai e vaalele tau o Amerika e tusa ma le 1000 futu i luga a'e o le aai o Hiroshima, *faaauau itulau e 7*

O le Sao o Tina i le Aiga ma le Tala Lelei

ma tautua mo isi, e pei ona tatau ai i soo se veape mo le nauna.

O le muagagana a lo tatou atunuu, “E au le ina’ila a tina.” E faaaloogia ma faalupe lona tofi tausi alii o le “faletua” - o lona uiga o le fale e tua iai lona alii le faletele; e nafa ma le tautua ma gasese, e eleelea aua e lafoa’i ma tuua’i iai lape ma masei uma e tula’i mai. E muamua ala, e mulimuli moe; e le malolo i le faatinoga le leoa o ona tiute.

E ta’ua foi o le “tausi” - aua o ia e feagai ma le tausiga o le aiga atoa ma lona faasinomaga. E tausi le soifua, saunia lelei o le tama i le va i fafo ma le lotoifale; e tausi le soifua laulelei, soifua a’oa’oina, soifua maloloina, soifua pulea lelei o le fanau, le tofi mai le Atua. E tausi ma le faamaoni i ana folafolaga ma ona nafa i taimi uma, tainane ina le faapea le tama ma le fanau i nisi taimi.

O isi ona ta’u masani e tusa ma ona tiute, o ia o le feagaiga, o le augafaapae, o le pae ma le auli.

Ae molimau le tala o le foafoaga i le Tusi Paia, e le’i lelei pe atoatoa le aiga ma le galuega a le Atua (e ui ina ua uma ona iai le tama), pe a na le’i iai le tina. “*Ua fetalai mai foi le Alii le Atua, E le lelei ina to’atasi o le tagata; ou te faia sona fesoasoani e tatau ma ia.*” Kenese 2:18.

Mai lena fuaiupu, e tupu se manatu faapea, o le finagalo lenei o le Atua mai lava i le amataga - e **tatau** ona iai se tina i totonu o soo se aiga, i soo se taimi, i soo se nofoaga. Soo se aiga e aunoa ma se tina, o se

aiga e le atoatoa ona lelei. Ina ua fai le galuega a lo tatou Alii o Iesu, na ia tau saili ni tane talafeagai e fai mona soo (“*ona silafia lea e ia o le uso e to’alua.....ona silafia lea e ia o le isi uso e to’alua*”) (Mataio 4: 18-22). Peitai o ona soo tama’ita’i e le’i tau sailia, aua na iai mai le amataga, ma na latou ofo fua atu lo latou sao, i le taimi ma le nofoaga tonu e mana’omia ai (“*Ua uma foi le uaina, ona fai atu lea o le tina.....*”) (Ioane 2:3)

O le Sao o Tina i le Aiga

O le a faapito lenei folasaga, i le aiga Samoa e pei ona outou soifua ma ou ola ai nei, i le si’osi’omaga faa-Samoa ua faa-Kerisianoina i le Tala Lelei.

O le ulua’i sao lava o le **tina**, o lona valaauina faa-Eva, mo le faatagataina o aiga; o le mea faigaluega a le Atua, mo lana galuega foafoa. Ona o lona alofa na te tau’ave, e fanaua, e faafailelei ma tausi i tagata ola uma e fananau mai i lona aiga (“*o Eva, aua o le tina o ia o tagata ola uma.*”) Kenese 3: 20.

O ia o le **faia’oga** i totonu o le aiga. (“*Lo’u atalii e, ‘aua foi e te tuulafoa’iina le upu a lou tina*”) Faataoto 1: 8. Na te a’oa’o ma a’oa’i le aiga ia popoto ma atamamai i le potosalalau, ia malamalama i le faasinomaga faa-Samoa, ia a’oa’oina i tu ma aga faa-Kerisiano; ia popoto i le va fealoa’i ma le va tapuia. O le faia’oga e a’oa’o atu e ala i lana faatinoga ma lana faata’ita’iga lelei.

O le **foma’i ma le tausi soifua** a lona aiga. E silasila i le soifua maloloina o lona aiga; ia tumama ma teuteu matagofie lona aiga, ia tosina ma fafia iai soo se tagata, aemaise i le silafaga a le Atua. “*O ai ea se alu a’e i le mauga o le Alii?.....O le ua iai lima mama ma le loto mama.....*” (Salamo 24: 3-4). O ia le ulua’i fesoasoani pe a tupu se faalavelave, e togafiti ma fusifusi manu’a; e fofo le lima ua gau, e toe faasa’o le vae ua mapeva.

O le **ositaulaga**, e ta’ita’i (pe a leai le tama)le osiga o tapua’iga a le aiga i le Atua, i le taeao ma le afiafi o aso fai soo. E faasatauro pe faaositaulaga (sacrifice) ona mana’oga, ina ia faamuamua mea ‘anoa o le ola faaleagaga. E tausolomua ma a’oa’o le faitau Tusi Paia ma le tatalo. E faasino le aiga ia matata’u ma faatuatua i le Atua, ia ava ma faaaloalo ma tausi i faifeau, ia tumau lona aiga i le tapua’iga faa-EFKS, ma lavea’i le fanau mai le tosina ma mulimuli atu i isi ituaiga. E sulufa’i ia te ia le sui o le aiga ua fetaia’i ma mafatiaga; o ia e lavea’i, e faamafanafana ma toe faalelei sootaga ua malepelepe.

O le **leoleo** i totonu o le aiga. E silasila i le tausiga faamaoni o le aiga, o tulalfono ma poloaiga uma - o tulafono e sefulu (Esoto 20), o tulafono a le malo, o tulafono a le nuu ma le Ekalesia, ma ana lava tulafono e faapitoa o lona aiga. E vaai i le faatinoga o le

faaauau itulau e 4

O LE LAUGA

Tusi Faitau: 2 Tupu 2: 9 - 14

Luka 11: 1 -4

Matua: 2 Tupu 2: 12: “.....Lo’u tama e lo’u tama e, le kariota o Isaraelu ma ana ‘au e ti’eti’e i solofanua.”

‘Au’au o le lauga: O le olaga faatama tausaaafia e maua ai manuia.

A tomanatu i le upu tama, e pei e foliga faigofie, ae leai, e loloto. E le mafai ona tatou malamalama atoatoa iai i se taimi puupuu. Aua a mafaufau i le tulaga o le tama poo tama i totonu o aiga, e faaalua lava lea i le uiga na fai a’i o ia - o ia e ona le aiga, o ia foi o le matai o le aiga.

O le tama, o ia o le totonugalemu e tafe mai ai le manuia, le malosi i lona ‘au’aiga. O le tulaga faatama lena, o le fesoota’iga o le aiga ma le ua iai le pule. O le mea lena e matua faaeaina ma faasilisili ai le suafa tama, aua o ia o le mamalu, o ia o le puna o le usiusita’i ma le alofa. (Esoto 20: 12; 21: 15,17)

O Elisaia o le atalii o le perofeta o Elia. Ae le se atalii na fanauina i le tino, a o le atalii na fanauina faale-galuega faaperofeta. O lona atalii faale-agaga. Na fetalai le Atua ia Elia, e alu e faauu ia Elisaia e fai ma ona sui i le tofi faa-perofeta. Ona la galulue soosoo tau’au ai lea i lo la faiva faa-perofeta, i le faapelepele ma le mafana o le mafutaga a le tama ma le atalii, o le atalii ma le tama, i le faia o le finagalo o le Atua i nai aso sa

la galulue faatasi ai.

E le’i toe ‘emo pe pa’ela le maitau a Elisaia i le soifua galue o si ona tama. Sa matua faamalieina le loto o Elia i le tautua auuuna a Elisaia. O lea ina ua iloa e Elia o le a aveeseina o ia e le Atua, ona fai atu lea o ia, “Elisaia, se a se mea ou te faia mo oe, manu e le’i aveeseina a’u mai ia te oe.” O le tali a Elisaia, “Ia faapea lava ona fai.” Ina ua siitia a’e Elia i le nofoa faataavaleale afi ma solofanua afi, ua ave o ia i le lagi, ae tulimata’i pea mata o Elisaia, ona tagi tautala ai lea o Elisaia ona o ona alofaaga i lona tama. Upu ia ua fai ma matua: “Lo’u tama e lo’u tama e, le kariota o Isaraelu ma ana ‘au e tietie i solofanua.” Ona pa’u ifo lea o le ofu o Elia ua tago iai Elisaia, ma foi atu loa i le aai.

E ui ina oona le alofa i le tete’aga ma lona tama, a ua faafiafiaina ona o le iuga ua ia vaaia - o le aveolaina a’e lea o Elia i le lagi. O le molimau lea i le olaga faatama o Elia.

A o le a le mea na faatusa ai nei e Elisaia lona tama i kariota ma solofanua? O le muagagana lena sa latou masani ai. O le faatusa o tagata iloga i mea taua ma le aoga. O kariota ma solofanua, o mea taua i le saililiga malo o le soifuaga o Elia na iloa e Elisaia. O ia o le tagata saili malo mo lona nuu ma aiga, oloo iai tina ma fanau aemaise o lona Atua. E le tioa sa’afi’afi ai Elisaia - “Lo’u tama e lo’u tama e, le kariota o Isaraelu ma ana ‘au e tietie i solofanua.” Na faamalieina le olaga faatama o Elia i le

faamaoni i ona tiute faatama, na iu ai ina aveolaina o ia i le lagi. Le olaga faatama tausaaafia e maua ai manuia.

O le Aso Sa, le aso ua faasino mo tama, aso 10 Aokuso mo lena foi tausaga, o le aso lea e faailogaina ai mo tama uma, tama matutua ma tama laiti. Tama, ua saunia e tina ma fanau fugalaau manogi ma le matagofie i ou la’ei. O le feasogi ma faamanuia, o meaalofoa ua foa’i atuatoa ma taumafa eseese e tele. O faaaliga ma faailoga uma na o le alofa ua liu tino mai. Malo. Faafetai. Faafetai lava. Ae faapefea la tatou pitolaau? E faapefea o tatou tiute faatama? O a a tatou amio ma a tatou faiga, ae a lo tatou olaga faale-Atua? A aveolaina oe i le lagi ma tatou o ese mai le lalolagi, e tausaaafia ea lo tatou o ese? Mata o le a ni tagisaga aualofoa e faia mo i tatou? O a ni o tatou aoga ma ni lelei o le a manatua ai pea tatou? O fai ea i tatou ma tama saili malo ina ia manuia fanau ma tina, ina ia manuia aiga ma nuu, ina ia manuia le galuega a le Atua?

Ou te manatua aso la o laugatogi. Sa ‘ote le tasi tama i lona atalii, ina ua tuua le faamanuia a le a’oga, fai mai lea tama, “Alii Paie, o le la e ave uma lava e To’aga faailoga o la outou vasega, ae se’i e lavelavea ane foi i sina faailoga se tasi. Na tali le tama o Paie, “E leaga e fai mai le faiaoga, ou te soo foi i lo’u tama le valea ma le amio leaga.”

O lona uiga, o le ata o le atalii
faaauau itulau e soosoo ai

O LE LAUGA

le tama. O le upu faa-Samoa - e soo le moasope i le moasope. A tatou lelei, e lelei foi ma a tatou fanau, lelei o tatou aiga aemaise le galuega a le Atua. Lafoa'i ia ni o tatou vaivai o iai. Toe fuata'i le soifua. Sasaa ia le fafao ma toe timata le upega. O se mea matua lelei lo tatou fulitua tausaa'fia. O loimata o le salamo, o loimata e faaolaina ai. O mea lelei uma ua faia e fanau ma tina mo i tatou i lenei aso faapitoa, e tasi lava le mea tatou te tau ai, o le fai lea o i tatou ma tama lelei, tama tausaa'fia e aumai ai manuia. E lelei le mulimuli atu o sa'afi'afiga. Lo'u tama e lo'u tama e, le kariota o Israelu ma ana 'au e tietie i solofanua. E le tiao tagi aualofa Tavita i lona tama faale-malo o Saulo - "Mauga o Kilepoa e, 'aia nei toe iai se sau, 'aia nei toe iai se ua, aia na lafoaina ai le talita a Saulo. Aue! ua maliliu toa ua maumau ai auupega o le taua." Ni loimata o le salamo ia fulitua tausaa'fia i mea lelei.

O lea foi le ata manino o le aoaoga a Iesu e uiga i le tama. Pe o faapefea lo tatou tulaga faatama i totonu o le Ekalesia? Sei o tatou toe vaavaai faale-mafaufau i le tatalo a Iesu i lo tatou Tama oi le lagi.

Lo matou Tama e oi le lagi....! O le tatalo faitele, o le tatalo a tama uma ina ia oo mai le malo o le Atua i tagata uma, Lo matou Tama, ia faia lou finagalo.....o tama uma ia ususitai ma faalogo i le Ao o le Ekalesia, ia faia mea uma i le matagofie ma le saunia lelei e tusa ma ona ala. Lo matou

Tama ia e foa'i mai ia te i matou.....o tama e aumai manuia e tasi ma fafaga i le ola faaleagaga o le Ekalesia. Lo matou Tama ia e faamagalalo.....o tama e ao ina maua le agaga o le fefaamagalalo'i, maua le loto fealolofaa'i.

Na faatele ona tatalo Iesu.....Lo'u Tama e, ia e faamagalalo atu ia te i latou, aua ua latou le iloa le mea ua latou faia.....tatou te fiu a e fai i tatou ma tama leaga ma le le faamaoni, ae le mafo'e ai, e le faaitiitia ai le alofa laveai, le alofa tunoa o lo tatou Tama oi le lagi.....Ioe, o le olaga lava faatama tausaa'fia e maua ai manuia. Peitai, e auma le taua o tama? E auma le ave ma tama na te taitai se aiga, se nuu, ma se atunuu, aemaise lana Ekalesia paia, pe afai na te le talia se fautuaga, pe afai na te

teena se tuualalo, pe afai na te faatuatuaana'i ma le manatu i se augani ma se tima'i a ona uso a tagata lautele mo le manuia ma le saogalemu o le Ekalesia a Iesu.....I le fesoasoani mai o le Alii.....Amene.

Ou te aualofa atu mo outou tama uma lava i le pese 138 fp muamua.

E lo'u Tama e ua faafetai
Ua sili lou alofa mai,
Ua fai ai a'u ma au tamafai
Ta faamanu ai nei.

Ua faafetai, ua faamanu
Ua fai ma uso o Iesu,
E ola ai a'u e faavavau,
Ta faamanu ai nei.

Faapa'ia N. Seumanutafa FS,
EFKS Penisula o Petesa,
Pulega Waitakere
Matagaluega Aukilani
NIU SILA.

O le Sao o Tina i le Aiga ma le Tala Lelei

faamasinoga ma le amiotonu; ia 'aia nei' iai ni faiga pi'opi'o faasolitulafono e aafia ai, e ono molia ma faasalaina ai soo se tasi o lona aiga. Afai foi na te silafia ni faiga faasolitulafono a lona aiga, o lona tiute le faailoa i le lotoifale ina ia taofia loa; peitai na te le faitala e ta'uta'u atu i isi aiga.

O le *matuaofaiva* i le faatufugaga o le tausoa ma le fautua. E tofu le tama ma lana

tofa ma le uta; ae fua le eseese o le mamao ma le loloto, i le eseese o fautuaga a tina taitasi. E mana'omia lona iai i taimi uma i tafatafa o lana tane, e faamalosi'au ma lagolagosua i le ta'ita'iina o le aiga. ("*Ona fai mai lea o le tupu ia te a'u ("oloo nofo foi i ona tafatafa lana masiofo")* Neemia 2:6. O le tuualalo a le tina e faasaoina mai ai lona aiga, i le faiga o faai'uga sese ma filifiliga leaga e malaia ai. "*Ona sau ai lea o le feau mai lana ava, ua faapea faaauau itulau e 6*

MATINI LUTERU

1483 - 1546

O le Auupega o le Toe Fuata'i

O le Malaia poo le Oti Faa-maturo

O le aso na sosoo ai, na tu ai Matini Luteru i luma o le vasega e tusa o le 400 tamaiti a'oga, ma ia faamalamalamaina mea na tutupu i le aso ua te'a. Ua faalatalata uma atu le vasega ina ia latou lagona pe o le a ni mea o le a tautala ai le Tagata Toe Fuata'i.

Ona ta'u atu lea e Matini ia i latou, e tataua ona latou filifili i mea e lua, o le malaia, poo le oti faamaturo. Na lapata'i o ia ia i latou, e latalata mai lava le malaia ia i latou pe a latou le filifili i o latou loto e faaauau se'ia oo i le i'uga, taumafaiga e tetee atu ai i faiga le talafeagai ma le faa-Kerisiano, a le lotu pope. Ona ia faapupula lea e faapea, o lea fetauiga ma le lotu e ono oo atu ai i le oti faamaturo.

E le taumate na fefefe nisi o le vasega i le oti faamaturo, peitai e le'i fefe ai Matini Luteru. Ua na iloa nei le mea na sau ai o ia i le lalolagi e fai. Ua tataua nei ona alu ese o ia ma le Katoliko Roma, ma faasaga atu loa e fai le taua aga'i i le anitikeriso. Na faalototeleina o ia i lona lagona o lona tiute lea mo le Atua, e ala i le valaauina e le agaga na te faia se toe fuata'iga. Na manino lava le faaosofia o ia ina ia faasaina ni tagata se toatele mai mea sese o fai e le Lotu Katoliko.

Ma le loto tele i le faataunuina o le mea ua ia

manatu e tataua ona fai, na ia fai atu ai i le vasega:

E mana'omia e le Ekalesia le Toe Fuata'iga. O le Toe Fuata'iga e le se mea na o le pope, pe se mea na o katinale.....Ae o se mea e aafia ai le lalolagi Kerisiano atoa, pe faapea foi, o le finagalo o le Atua. O afea e taunuu ai lea Fuata'iga na o le Atua na te silafia. A o le taimi nei, o le tatou tiute le faalauiloa o mea pi'opi'o oloo iai.

Ou te le mana'o e faia se taua mo le Tala Lelei e faaogaina ai le malosi ma sauaga e oo i le oti. O le lalolagi e mafai ona faato'ilaloina e le Upu. Oloo faasaina lava le Ekalesia e oo mai nei, ma e oo foi ina toe fuata'i e le Upu.....E le o sa tatou galuega lea ua salalau nei i le lalolagi, aua e le mafaia e le tagata na o ia lea mea. A o le isi oloo ia 'u'uina le foe, o le e le o iloa e i latou o 'au'au faatasi ma le pope, o latou ia o latou tuua'ia tatou.

O le faamatalaga a Matini e uiga i le oloo ia 'u'uina le foe, o lona uiga o le Atua lava lea. E ui o tuua'iga oloo pa'u i luga o Matini, a ua ia sauni lava i soo se taimi e amata le Toe Fuata'iga mo le Atua.

O Tusitusiga e Faasa'oloto ai

E ui lava ina ogaoga le susunuina o faatonuga ma tulafono mai le pope, peitai pei ua tatalaina mai ai Matini mo se saolotoga na te le'i iloa

muamua. Mulimuli ane ona faailoa lea e ia faapea, na sili lona fiafia i lona susunuina o ia faatonuga ma tulafono, i lona fiafia i se isi lava mea i lona olaga.

O lea sa'olotoga na avea ai le tausaga na sosoo ai ma tausaga aupito sili ona tele mea na ia faia ai. Ua faasolosolo ina matua ona talitonuga ma lagona, faatuputeleina lona lauiloa i le atunuu, ma ua oo foi ina faamautuina le tele o mataupu sa ia talitonu iai. Ua tuuina atu nei le tele o ona taimi mo le galuega faafaifeau - lauga, a'oa'o, faia'oga, ma tusi ana tusi o faamalamalama ai le tulaga o tagata faapea le lalolagi atoa.

E tele ni tusi na tusia e Matini e faitau ma su'esu'e ai, o le isi o ia tusi oloo faamatala ai talosaga e fitu oloo iai i le Tatalo a le Alii, ma ni lauga e nofo sauni ai mo le oti, salamo, papatisoga, ma le Faamanatuga. Sa ia tusia foi tusi e faamatalaina ai le tusi o Salamo ma le Kalatia.

O se mea faigofie lava ia Matini le tusitusi o ana tusi. "E vave lo'u lima ma maamaai lo'u mafaufau." O lana tala lea. "A ou tusitusi, e tafe mai pei se vai, ou te le tau tauanauina." Ae aupito sili ona lelei le tusitusi a Matini pe afai o iai se isi o tetee mai ia ia, faaita ia.

"A pupuna a'e le ita i lo'u loto, o le tauga lelei lena o lo'u tusitusi." O lana tala lena.

O le tele o tusitusiga i le tala faasolopito o le Ekalesia, na ala ona tusia ona e tali atu ai i ni mea sese poo ni faitioga. E oo foi i tusi a Paulo i le Tusi Paia, e tele lava i ni tusi i se Ekalesia, oloo ia faasinotonuina ai se mea

faaauau itulau e II

O le Sao o Tina i le Aiga ma le Tala Lelei

mai le itulau e 4

mai, Ne'i e mao i lea tagata amiotonu." Mataio 27: 19. O le tina e faalagolago iai le manuia ma le puapuagatia o aiga.

O le matafaioi a tina i totonu o aiga, e le muta. O le tele o aiga e faata'eta'e aluga tama, aemaise i le tausiga o fanau, ae manatu le pepa e ao ina galulue ma faasoa faatasi i taimi uma.

O LE SAO O TINA I LE GALUEGA A LE TALA LELEI

O se tasi o toe fetalaiga a lo tatou Alii mai luga o lona satauro, na ia poloa'i ifo ai i lona soo o Ioane, "Faauta, o lou tina!" (Ioane 19: 27a). O lo'u taofi, o le finagalo o le Alii mo lana Ekalesia, ia alofagia tina ma ia tausia lelei i latou. Ia aloa'ia ma faapa'ia lo latou sao i upu fai o le Ekalesia, faapea lana molimau ma le tala'iga o le Tala Lelei.

O tina o le itu tino paia o le Ekalesia, e aia tutusa ma agavaa tutusa faatasi ma isi itutino, i faamanuiaga mai le alofa tunoa o le Atua, i le galuega a le Ekalesia (1 Kori. 12: 14-26). E faaaoga e le Alii le sao o tina e fai ai vavega tetele ma galuega ofoofogia o lona malo. E pei o le vavega na fafagaina ai le motu o tagata e silia ma le 5,000, i areto karite e 5 ma i'a e 2 a le tasi tamaitiiti (Ioane 6: 1-14). E ui ina e le o ta'ua mai, ae o le mea'ai a lea tamaitiiti, ou te talitonu na saunia lelei ma tuu iai e lona tina. E manatu

foi sa a'oa'oina e lenei tina lana tama, ina ia faasoa atu lana mea'ai mo soo se isi, pe afai e mana'omia mai.

E manino mai lea tala, afai e saunia lelei tina i o latou tiute masani, ma latou faia i le loto ua saunia lelei, e faaaoga e le Alii lo latou tautiga e tutupu mai ai nisi mea tetele ma le ofoofogia, mo lana galuega faaola.

Manatua foi nisi o tina iloga oloo ta'ua i le Tusi Paia, na faamanuia iai le Atua ona o le soifua galulue ma le faatuatua talitonu i le alofa tunoa o le Atua, e iai:

i. Sarai le toalua o Aperamo. O lona soifua talitonu o se faataitaiga lelei tele mo tatou uma, aua e iai le taimi o le Atua.

ii. Elisapeta le tina o Ioane le Papatiso, na teuteu le ala ma faamafolafola loto o tagata aua le afio mai o le Mesia e pei ona valo'ia.

iii. Maria le tina o Iesu e faamaoni ma usitai i le finagalo o le Atua, e ui ina tigaina ma faamaina Iesu ona o le tagata, ae maualuga le talitonuga o Maria ia faia le finagalo o le Atua, ua avea Iesu ma Faaola o tagata uma.

I le isi itu, e avea foi tina ma faapogai o mea tiga ma faanoanoaga i totonu o le Ekalesia, pe afai e le faautauta ma le mataala. E pei o le faletua o Potifara (Kenese 39:7) i lona taumafai e faamalosi Iosefa.

O Iesepela le masiofo a le tupu o Aapo (1 Tupu19) na ia faatonu ana fitafita ia fasiotia

Jesus response to suffering people and to "nobodies" provides a glimpse into the heart of God.

Philip Yancey in his book: "The Jesus I Never Knew"

perofeta a le Atua, ae faasaina perofeta a Paala, ma lona taumafai e taitai tagata e tapua'i i tapuaiga sese.

O Herotia le masiofo a le tupu o Herota (Mataio 14: 1-12) na ia faaosooso i lana tama teine a fesili atu lona tama i se mea e mana'o ai, ia tali atu e manao i le ulu o Ioane le Papatiso.

O tina i le tulaga ta'ita'i, e ulu iai aiga, le nuu ma le malo; a o tina e tu'inaanau i mea o le lalolagi, e le lelei o latou loto. O tina faapea, e fiafia le tiapolo na te faaaoga e lepeti ai le galuega a le Atua. E lagona ai le masiasi, ae a'oa'o mai ina ia 'aia tatou te pei o ia ituaiga.

I le galuega a le EFKS, ua manino le tele ma le anoanoa'i o feau eseese ua tau'ave ma faataunuu e tina. O le tapenaga o mea uma ina ia saunia lelei ma ia matagofie tulaga uma i le vaai, i le faalogo, i le tofo, i le pa'i, ma le lagona o tagata. E mai le malumalu tapua'i e oo i le tunoa o le galuega, lana auaunaga ina ia faataunuu le finagalo o le Ao o le Ekalesia, e ala i fuafuaga ma taupulega a Tama o le Ekalesia.

O le faamanatu, ia mataala le faletua o le faifeau i taimi uma, o i latou o auupega taua e fai ma faata'ita'iga mo mea lelei uma. O si au musumusu ma lau tuualalo mo mea lelei e

faaauau itulau e 9

Peresitene Bill Clinton ma le Sui Talavou Samoa

faaaauau mai le itulau muamua

le Matagaluega o le Va i Fafo (Foreign Affairs a Niu Sila), le alii o Alafale Andrew Lesa. O le ata na pu'eina i le Fono na taloina e Malo Afaatasi, UN Summit on Healthcare, i Melepone Ausetalia aso 25 Iulai - 1 Aokuso 2014. O Alafale o se diplomat, o se alii ofisa i le Matagaluega o le Va i Fafo o Niu Sila. O ia sa fai ma sui o Niu Sila i lea fono, na ala ai ona feiloai ma Bill Clinton, o lana faaaliga lea i le Sulu Samoa.

Fai mai a ia, o ia le diplomat aupito laitiiti i lea fonotaga. Na valaauina nisi o sui usufono se to'a sefulu e feiloa'i ma Bill

Clinton ma latou talanoaina ai e le gata i mataupu tau Healthcare a o le taua i le va o Isaraelu ma Gaza. Na ia faaaliga le naunauta'iga o Niu Sila i le tausiga o le filemu, faapea ma Tulafono Faava-o-Malo. Sa talanoaina foi le lagolago o Amerika mo malo o atumotu e pei o Samoa, pe faapefea ona faaleleia atili. O le mataupu o le Healthcare o se mataupu lava e laualuga i fuafuaga a le Malo o Samoa, ma e taua le faaaliga o taitaiga ma le lagolago o malo e pei o Amerika. O le alii o Alafale e mai le alalafaga o Saanapu, Sapapalii ma le Itumalo o Falealili.

O le Fono Tele i Malua i le tausaga nei na taitai ai Alafale i le fofogaina i luma o le Fono Tele, o le Pepa na saunia e Tupulaga Talavou o le Matagaluega a Manukau. O lea pepa oloo lolomia i le itulau muamua o le Sulu Samoa o le masina lea ua te'a, o Iulai 2014.

Faamalo atu ia Alafale Andrew Lesa ona o le tofiaina o ia e fai ma sui o Niu Sila i lea fonotaga. E tatou te fiafia ona o ia o se tasi o a tatou tupulaga talavou e faamoemoe iai le atiinaeina o le tatou Ekalesia, ma o tatou aiga.

Ia manuia tupulaga talavou uma a le tatou Ekalesia, ma Samoa.

E le'i faia le Matuu mulimuli

Hiroshima:

Iapani, le uluai pomu atomika a le lalolagi. Na matua malepe ai le aai o Hiroshima, ma maliliu ai tagata e tusa o le 120,000. Pe tusa o le vaiaso ae toe faapa'u ifo e Amerika le isi pulu atomika i luga o le aai o Nagasaki i Iapani lava, ma malepe ai foi lea aai. Ma siilima ai loa Iapani ma ola ai le Taua Tele Lonalua a le Lalolagi 1939-1945.

O le aofai atoa o i latou na maliliu ma manunu'a i le pulu atomika i Hiroshima e silia i le 200,000. E 5,500 fale na mu atoa e leai se mea na totoe. "E 2,300 ni fale na mu na o ni vaega, E 7,000 fale na nutililiina e le malosi o le pa a le pulu atomika, ae 4000 fale na malepe na o ni vaega.

O le vevela o aso pito vevela

i Samoa nei, e tusa lea o le 78 tikeri. A o le vevela o le aai o Hiroshima ina ua pa ai le pulu atomika muamua, e 300,000 tikeri! Na usi ai 'apa o fale! Na usi ai u'amea! Na pupuna ai le ta o alatele! Na pupuna ai vai o paipa! Na vevela ai le suasami ma vaitafe. Na liu efuefu ai tagata e fia sefulu afe!

O Iapani o le atunuu e susunu o latou tagata pe a maliliu, ae faaputu le efuefu ma teu, pe faasalalau foi i le elele poo le sami. Peitai o i latou na maliliu i le pulu atomika muamua, e le'i tau susunuina, aua o le toatele lava o i latou, na mu ma liu efuefu. E le'i faaputupuina foi ni lefulefu, aua o ai a na faaputupuina ua feoti uma.

Na maua so'u avanoa mai le malo o Iapani ou te taamilo ai i

lea atunuu i le tausaga e 1973 i le masina o Aokuso e faamanatu ai le pule atomika. Na ou oo i le falema'i o le pulu atomika oloo iai pea nisi oloo mama'i ai ona o le pulu atomika. Na ou iloa ai le mata'utia tele o puapuaga e oo iai, pe a pa se mea faapea i le lalolagi. A o pulu foi ua maua nei e Amerika, Rusia, Farani ma Peretania, pulu niukilia, e faafia selauina le malosi o le ulua'i pulu faato'a tutusa ma le pulu niukilia e tasi. Na ou vaavaai atu i itu e fa o Hiroshima ma ou iloa ai, e pei lava le le'i faaleagaina e se pulu atomika. O se aai tele ua toe fausia, i luga o le fogaelele ma lalo foi i le manava o le elele. Na ou alu atu i le malae ma le fanua faamanatu o i latou na maliliu i le pulu atomika, ma 'ou taina ai le logo i le togalaau, ma 'ou tatalo e pei ona ua fai nei ma masani i lalo o lea logo, na ou tatalo: Le Atua e, se'i e alofa mai, 'aua nei toe pa se pulu atomika i lo matou lalolagi.

faaaauau itulau e 10

O le Mafuaaga o le Pese: **God Be With You**

“Ia faatasi pea Iesu ma oe”

mai le itulau muamua

Kerisiano lava latou, ona tatou suia le upu lea i lo tatou fai atu: “Ia faatasi pea Iesu ma oe?” Pe faapea foi: “Faatasi Iesu!” A faaopoopo le faaiuga o le laina o le pese ua fai ma ulutala ona faapea lea: God be with you till we meet again.” *Till we meet again* o lona uiga, e faamoemoe e toe feiloai i le manuia, ae le o ni mala ma ni faanoanoaga.

O le na ia tusia upu o le pese lenei - *God be with you till we*

meet again, o le alii o Jeremiah E. Rankin, e tele ni aulotu Faapotopotoga Kerisiano na faifeau ai i le itu i sisifo o le Iunaite Setete o Amerika seia oo i le tausaga e 1889, lea na tofia ai o ia e ave ma peresitene o le Howard University, o se iunivesite na lauiloa i le a’oa’oina o tamaiti uli.

O Rankin o se failauga matua logologoa, o se taitai matua lelei, ma o ia o se tasi na ia faatauaaina pesega a aufaipese i

sauniga lotu. O ia foi o se tusi solo na ia tusia foi le isi pese lauiloa - “Tell it to Jesus”.

E leai se pese e sili ona faaaogaina soo i faamavaega e pei o le pese lenei, se’i vagana ai pe a le pese “Blest be the tie that binds”. Sa faaaogaina pea lava pea i sauniga faaevagelia i le Iunaite Setete o Amerika faapea ma Europa i tausaga e tele.

Poo le a lava foi se fonotaga tele a le Au Kerisiano i soo se itu o le lalolagi, pe faatofa atu foi i se tasi o le a alu ese ma le mafutaga a le auuso Kerisiano, poo se tasi foi ua maliu, o le pese lava lenei e usu e faamavae ai - **God be with you till we meet again** - “*Ia faatasi pea Iesu ma oe.*”+++

*God be with you till we meet again, by His counsels
guide, uphold you’
with His sheep securely fold you - God be with you till
we meet again.*

*God be with you till we meet again, ‘neath His wings
protecting hide you,
daily manna still provide you - God be with you till we
meet again.*

*God be with you till we meet again, when life’s perils
thick confound you,
put His arms unfairling round you - God be with you till
we meet again.*

*God be with you till we meet again, keep love’s banner floating
o’er you,
smite death’s threat’ning wave before you, God be with you
till we meet again..*

*Chorus: Till we meet, till we meet, till we meet at Jesus’
feet, till we meet,
till we meet - God be with you till we meet again.*

O le pese lea o lolomi atu i luga, na faavae ai le tatou pese lauiloa o faamavaega, “Ia faatasi pea Iesu ma oe”, lea oloo lolomi atu i lalo:

Ia faatasi pea Iesu ma oe

Ia faatasi pea Iesu ma oe!
Tausi ia te oe la’u pele!
Ia faatonu pea lou ala;
Ia faatasi pea Iesu ma oe.

Ia faatasi pea Iesu ma oe!
Ia iai i lou agaga;
Ia tumau i lona alofa;
Ia faatasi pea Iesu ma oe.

Ia faatasi pea Iesu ma oe
Faapaolo pea lou ola;
Ia mamao ai mala uma;
Ia faatasi pea Iesu ma oe.

Ia faatasi pea Iesu ma oe!
Lana fu’a i ou luga
Lona alofa maua pea;
Ia faatasi pea Iesu ma oe.

Tali:

E tumau! E tumau!
E tumau le faamoemoe!
Ia Iesu! Ia Iesu!
Ta te toe feiloa’i ai!

Salamo 31: 1-5

E toatele Kerisiano ta'uta'ua latou te taulotoina mai nisi o ulua'i fuaiupu o le Salamo lenei e 31 i o latou toe taimi a o lei maliliu.

O le Emeperoa o le Malo Pa'ia o Roma, o Salesa V, i le vai taimi o Matini Luteru, sa ia te ia i ona toe taimi se faamatalaga o le Salamo 31: 1: "Le Alii e, ou te faatuatua lava ia te oe; aua ne'i faamaina au e oo i le faavavau; ia e lavea'i mai ia te au i lau amiotonu." O le fuaiupu foi lenei na ia mana'o e faitauina atu e se isi ia ia a o toe o ni nai minute uma lona soifua.

O le misionare ta'uta'ua o le Ekalesia Katoliko - Francis Xavier, o le Salamo foi lea e fafia iai. O le misionare lenei na ia toto le lotu Kerisiano i Initia, Indonesia, Iapani ma Saina. Na ia ta'uta'uina foi le Salamo 31: f.1 i ona toe taimi.

O Iesu ma Setefano na la ta'ua le Salamo 31 f.5 i o la toe taimi. Faapea foi ma isi i o latou toe taimi e pei o Charlemagne, Thomas a Becket, John Hus, Jerome o Prague, Martin Luther, Christopher Columbus, Thomas Cromwell, Lady Jane Grey, Mary Queen of Scots, ma John Knox.

O le Salamo 31 f.5 vaega muamua, na alagaina e Iesu ma Setefano i o la toe taimi: "Ou te tuuina atu lo'u agaga i lou aao....."

O le Sao o Tina i le Aiga ma le Tala Lelei

mai le itulau e 6

sagatonu ai fuafuaga ma aiaiga o soo se mea fai a le Ekalesia. O lau fesoasoani e aupito vava lalata ma le tama faifeau i le vaavaai ma le toto'a i soo se itu e fia faaleleia atili o le galuega. E te tapenapena, soalaupule, faasoa i agaga o tina mafuta ia faaosofia e mafuta ma le to'afilemu, e ao foi ina manino ma malamalama le faagasologa o le galuega i fuafuaga mamao faataatitia i le itu tau tupe maua ma tupe faaalu o le faalapopotoga, aua o le isi lea mafuaaga o le solomuli o nisi sui o mafutaga, ona o le le malamalama ma ua motusia fesoataiga ma taitai, maua loa i le faapalapala ma le musua. Peitai e tumu i le faaalalo i le va nonofo ai, ma lolo lava lagona ona o le alofa i le galuega a le Atua.

E le faagaloina Faletua Penisione Manumalo, talofa ua afu lo outou soifua i le galuega sa outou fitaituga ai i tausaga e tele, lea ua a'e manumalo, malo le fai o le faiva malo faatoatoa. O a outou fautuaga, faataitaiga lelei, ma tima'iga lea ua sapi ai tupulaga fai mai. E pei o totonu o aiga ua ta'ua i luga, e faapea foi i totonu o le galuega a le Tala Lelei, le faatinoga o le sao o tina. Ma e fia faamalosi atili

nei sao, e ala atu i lenei pepa. Soo se tina lava ua faatalaleiina e ao ina amio faa-Kerisiano, tautala ma le faaeteete, fesoatai i mea lelei i taimi uma, ma savali e tusa ma le tautala (walk the talk).

O tina e taulamua e auai i tapuaiga faitele, ma ta'ita'i lona aiga ia lolotu i Aso Sa taitasi ma isi sauniga uma. Ona o ia foi o le teuolua a le aiga, e ao ona mafola lona lima e tata'e le fagu, e sasaa uma le u'u, mo le galuega a le Atua. O nisi tina ua nofo toatasi, e faapaleina i le tofi tiakono e auauna ai mo lona Alii. E avea nisi ma faia'oga Aso Sa, i le a'oa'oina o fanau. O le sui aufaipese e faaoga iai le si'ufofoga mo viiga i le Atua, ma auai i le galuega faa-atalavou. Ae silisili ona taua, lona tulaga i le Mafutaga a Tina o le Ekalesia, e ao i tina uma ona auai, e mafuta ma militino faatasi ai, e fetufaa'i i meaalofa felanua'i a le Atua.

O le tina alofa moni i lona Alii, e saili ina ia mama le avega a le Ekalesia, e le mana'o e fai o ia ma satauro/avega e tau'ave a le Ekalesia. E saili i mea e manuia ai le tino vaaia o Keriso, aua a manuia ma maloloina le tino atoa, e tafe atu ma manuia ai itu tino taitasi.

Le Ta'ita'i'au Tootuli

I le taimi o le Taua Tele Lonalua a le Lalolagi - 1914-1918, na fiu fitafita e saili poo fea o iai le Ta'ita'i'au Sili o vaega'au uma a malo 'au'au faatasi. Ua oo i le taimi o le fono tele a o le'i alu le osofa'iga autu o le taua. Ae te'i ua fai ane le kuka, "Ou te masani i le toaina. E le taumate oi le falesa. Ai foi o tatalo ai.

E moni lava le kuka, e saili atu, o le la e tootuli mai le Ta'ita'i Sili i le falesa, oloo tatalo ai i le Atua a o le'i alu le osofa'iga.

Hiroshima:

mai le itulaqu e 7

E le'i faia le Matuu mulimuli

I lea aso, ma lea aso, ma lea aso, e usu ai le teineitiiti, ma fai ana tama'i manu pepa papa'e, o matuu, ma tautau i lala o le laau o lona aiga. Malama le taeao, usua'i le teineitiiti e fai ana matuu pepa, oo mai le po malolo. Malama le taeao, usua'i le teineitiiti e fai ana matuu pepa, oo i le po toe malolo. Te'a atu lea vaiaso, oo mai le isi vaiaso. Te'a atu lea masina, oo mai le isi masina, a o lenei lava e usua'i le teineitiiti e fai ana matuu pepa, i lea aso, ma lea aso, ma lea aso, ma lea aso. Fai mai le faatonuga a le tina i lana tama: Fai ni au matuu pepa ma tautau i le laau. E atoa loa le afe le aofa'i o matuu, ona e malosi lea.

Na amata ona fai matuu le teineitiiti, o malosi. Ae le'i tele ni masina, ae faalogoina e le teine ua tauau atu lava lona malosi. Ua vaavaai atu foi le tina i lana tama, ua faasolosolo atu lava lona tino, ma lona malosi. Na amata o tele matuu e fai i le aso, a o lenei ua oo ina ua na o le lua, pe tolu matuu i le aso. Ae loto malosi lava le tina ma fai i lana tama: A atoa loa le afe le aofai o matuu pepa, ona e malosi loa lea.

Na logo tala le toatele o matua i lenei tala, ona faatonu foi lea e i latou a latou fanau, , e fai ni a latou matuu pepa, e malolosi ai mai o latou ma'i. O le teineitiiti

lea na amataina le faiga matuu, ua oo nei i le na o le tasi le matuu i le aso, ona ua vaivai. Ua atoa nei le iva selau iva sefulu ma le iva matuu pepa ua uma ona fai. A oo i le aso a taeao, ona fai lea o le matuu mulimuli, e atoa ai le afe o matuu pepa. Peitai, e lei faia le matuu mulimuli, aua o le aso lea, na oti ai le teineitiiti. Na oti ai le fai matuu!

O le masina o Aokuso 1953, na ou tu ai i lalo o le maa faamanatu vae 'u'umi, o le maa e faamanatu ai le faiga o matuu, i le aai o Hiroshima i Iapani, i le mea tonu na pa ai le pulu atomika, ma ou matamata i le afe ma afe o matuu pepa o tautau ai, i lalo o le maa. Ae le gata i lea, o laau i lea fanua faamanatu o le pulu atomika, oloo tanoanoa i o latou lala, le afe ma afe o matuu pepa papa'e, e faamanatu ai le faiga matuu a le teineitiiti ona o le toe fia malosi mai lona ma'i, na mafua i le pulu atomika lea. E faamanatu ai foi le lototele o le tina, ma lona moomooga, a atoa loa le afe matuu, ua malosi lana tama. Ua fai nei lea mea, ma tu a tagata Iapani, aemaise lava latou i Hiroshima.

O le Aso Sa o Tamaiti, e teu ai falesa, e tafili fatu laugasese, poo ni teu pepa foi. E tautau fu'a e tele e faamanatu ai e ua maliliu. E su'i palepua aiga i le po o le

Aso Toona'i. E malama le taeao o le Aso Sa, ua sauniuni uma aiga. E ta'e'ele po tamaiti ma fai o latou 'ofu papa'e. E fai fusiua, 'aso, lipine ma taulima. E pauta ma sausau, ona fai lea o pale.

E fai solo 'u'umi a tamaiti 'ofu papa'e, ma pepese, 'ae faatalitali mai matua i le falesa. E fiafia ma mitamita le to'atele o matua, 'ae o nisi, e matamata ma loimata, 'ona 'ua le atoa le 'aiga. Ua maliu le tama, poo le tina, poo le atalii, poo le afafine. E fai lauga a tamaiti, ma faapea, 'Ua iai nisi o matua 'ua le aulia mai le aso o i matou le fanau.'

E iai pea lava pea le faamoemoe, ia fai Lotu Tamaiti i lea tausaga ma lea tausaga, peita'i, e le faataunuuina uma faamoegoa. E pei lava foi o le faiga matuu a le tina loto tele i Hiroshima i Iapani, ma lana tama teine, ina ia toe oo mai le malosi, ae le'i faataunuuina. E le'i faia le matuu e atoa i ai le afe o matuu, ma malosi ai le teineitiiti, e pei o le faamalosi ma le loto tele a le tina, e ui lava e le taumate na na iloa, e le i'u i se lelei le ma'i o lana tama. 'Ae o le mea e sili, e le'i tineia le faamoemoe malosi o le tina, e le'i faavaivai foi le teineitiiti e fai matuu, e ui lava ina vaivai o lona tino, ma oo ai ina tau le mafai ona fai o se matuu.

Sa iai pea le faamoemoe e oo i le oti.

mai le tusi:

Maunu Mai Loimata o 'Apa'ula

tusia e

Afemata T. Apelu Aiavao

MATINI LUTERU

1483 - 1546

O le Auupega o le Toe Fuata'i

o sese. I le, e faapea foi ma Matini Luteru. O ana tusitusiga na fana tonu lava i mea sese, poo ni lu'i mai ia i latou o tetee mai, aemaise le au pulega a le pope. O ia mea sa fetusia'i ai lava Matini ma i latou o 'aua'u faatasi ma le pope. O ia foi tusitusiga sa lomina ma tufatufaina i le atunuu atoa.

E toe fia ta'ua uiga na totogo a'e ia Matini Luteru i lea vai taimi. Ua faatupuina tele lona loto tele, malosi, mautinoa ma lona talitonu i mea ua ia faia. E le taumate na ia amata mai le monaserei e tau tevateva lana alu,

poo ona manatu, a o le taimi lenei, ua maumaututu ona talitonuga ona o le malosi ua ia maua mai i le mea moni ma le amiotonu. O le mafuaaga o ia suiga ia te ia e faavae i luga o lona malamalama i le mea moni ma le faamaoni. O lona maua o le sa'olotoga e auala mai i le upu moni, na ia amata ai ona ia lu'iina le pogai o le saisaitia o tagata - o le lotu.

Sa sailiili pea lava pea Matini i le Upu a le Atua e sili atu i lo se isi mea. Ma o le faateleina o lona malamalama i le Upu a le Atua, o le faatuputeleina foi lea o le manino o mea uma i lona

mafaufau. Ua ia matua save'uina nei talitonuga faalelotu lea ua ufitia ai nei Europa.

E le gata ina a'oa'o atu ma lauga, a ua ia osofa'ia foi temoni faale-lotu i ana tusitusiga. O le malosi mai o le tetee o i latou e tetee ia te ia, o lona vilivilita'i foi lea e save'u mataupu silisili ua leva ona faavaeina mai i senituri ua mavae.

O Se Feau mo Tamalii o Siamani

E 4,000 kopi o le tusi a Matini Luteru - "*O le Lauga mo Aiga Tamalii Kerisiano o le Malo o Siamani*" - na lomina ma faatauina atu i aso e sefulu ma le valu. Ma toe fai foi lea o isi lomiga ona o le mana'omia pea. Toetoe o aiga tamalii uma o Siamani na latou faitauina. Na faaalua foi e Matini i lea taimi: (1) soo se tasi ua papatisoina, o le faifeau i luma o le Atua.

Na tusia e Matini e faapea: o le Faatuatua e le o se galuega a le tagata. A o se lagona na faatupu e le Atua. O le malamalama lea i le ola fou ua maua'a i le loto, ina ua maua le faamaoniga o le alofa o le Atua e ala mai i le tala lelei o le alofa o le Atua e tauaala mai ia Keriso. O le mea e fai e le tagata e tali atu ai i ia lagona mai le Atua, e lelei, poo le a lava - savali, tula'i, 'ai, inu, moe. E tuu faafeagai lea ma lona le faataunuu o ia lagona, e le lelei.

Na avea lenei vai taimi e osofa'ia ai e Matini le talitonuga i galuega. O galuega e foliga mai e lelei, peitai ona o le loto o le tagata e le lelei, o se agasala tele lea i luma o le Atua.

mai le Tusi: God's Generals tusia e Roberts Liardon,

Ua fai ona Apa'au ma Felelei ai Faatasi ma isi Agelu

E laitiiti lava si tamaitiiti, pe na o le lima ona tausaga pe a. O lea e nofo i le faasitepu o le falema'i o tamaiti, o se vaega o se falema'i su'esu'e. Na tau atu le matou vaega, o tausima'i a'o'oga i le falema'i, o nofonofu mai i le faasitepu.

Na ou vaai muamua iai, o ia ma lona tina, ma lona tama, ma lona tuafafine e matua ia ia. Ua uma ona ou iloa oloo iai sona uso matua e valu ona tausaga, oloo ta'oto i le falema'i o tamaiti, e maua i le leukemia.

E nofonofu lava e le pisa i le aso lea, o fai lona suti uliuli, ofutino pa'epa'e ma le fusiua uliuli. O le tausaga e 1973.

Na fesili atu iai se isi o le

matou vaega: "O 'e fia maua se fesoasoani?"

"Leai. O lea ou te faatali i lo'u tama." Na luelue lona ulu aga'i i le falema'i o tamaiti. "O le la ei totonu, e tapena mai mea a lo'u uso. Ua oti lo'u uso, e te iloa?"

Na tali se isi o matou: "Toe, ua matou iloa. Ua matou faanoanoa ai foi." O le mea moni, ou te le'i iloa ua oti le uso o le tamaitiiti. Ua oso mai ai lo'u faanoanoa mo le tamaitiiti ma lona aiga.

"Ae leai se mea o iai! o le tala lea a le tamaitiiti, ma 'ata'ata fiafia. "Ou te toe vaai iai i se aso. A o le taimi lenei, o le la

faaaau itulau e 13

Taamilosaga Kirikiti Palagi EFKS 2014

O le agaga mauiluga o Tama o le Ekalesia, ia atiina'e tupulaga e ala i taaloga.

O le Aso Gafua 23 o Iuni se'i oo i le Aso Tofi 26 Iuni 2014, sa faataunuu ai lea taamilosaga i Tuana'imato - le malae faavaomalo.

Sa tatalaina nei taaloga i le sauniga puupuu na saunia e le Susuga i le Komiti Faatonu o le Matagaluega a Apia i Sasae o Asotasi Gu Time F.T. Ina ua mae'a le sauniga ona saunoa lea o le tamaitai o Sala Terry le faauluuluga o le Asosi Kirikiti i Samoa, e tatala aloa'ia lenei faamoemoe. Sa ia saunoa ma faamalosi'au i alo ma fanau o le Ekalesia, ia taalo faatamatane ma faailoa le amio faaaloalo ma le faa-Kerisiano.

O le Asosi Kirikiti Samoa ma le Faatonu o A'oa'oga Kerisiano le Susuga Faito'aga Tolua FS ma lona ofisa sa faafoeina nei taaloga. E sefulu tolu 'au a alii, na vaevaeina i pulu e tolu. E valu 'au a tama'ita'i na vaevaeina i pulu e lua.

Sa vaai lava le fiafia o tupulaga o le Ekalesia i nei taaloga, aemaise ua fetau ma le tuuga o a'oga. Na o le lua autalavou na auvasa mai i Salafai - o le autalavou a Iva ma le afioaga o Sili. Saunoa le Susuga i le Faatonu - o le Matagaluega a Apia i Sasae lea oloo toatele autalavou oloo auai, ai ona o le lata i le malae o fai ai taaloga.

O le iuga o nei taamilosaga -

au a alii - (1) Uafato - Apia i Sasae na maua le talita, ipu ma le tupe. (2) Faleaseela o Aana - ipu ma le tupe. (3) Manunu o Apia i Sasae - ipu ma le tupe. (4) Pata Falelatai o Aana - ipu ma le tupe. (5) Saoluafata o Apia Sasae - ipu ma le tupe.

Vaega o Tama'ita'i: (1) Vailele o Apia Sasae - talita, ipu ma le tupe. (2) Magiagi - Apia, ipu ma le tupe. (3) Saoluafata - Apia Sasae, ipu ma le tupe. (4) Matautu Falelatai - ipu ma le tupe.

Sa tofu faailoga uma 'au sa auai i lenei taamilosaga. Na maua foi e autalavou uma sa tausinio nai seleni e tapena mai ai, mo nei aso i nei taaloga.

Manaia le faagasologa o nei taaloga e ese mai nisi foi o taaloga i totonu o le atunuu ua tele ina tutupu ai misa i le va o tupulaga. Ua le gata i taaloga a a'oga, a ua oo lava i nuu ma alalafaga, ua vevesi ma taua'imisa.

Na o nai faasea lava sa aliali mai i nisi 'au taalo, ae sa fo'ia lava e le Komiti Faafoe, i le va fealoa'i ma le ava fatafata. E momoli ai le faafetai tele i le Susuga ia Faitoaga Tolua ma lona ofisa ona o le tapenaga o lenei faamoemoe. Vaai pea galuega a le Susuga i le Faifeau Faatonu o Aoaoga Kerisiano ma polokalame faaauau, e le gata i taaloga, a o mafutaga.

Ua toe faasolo i tua la'u vaai i aso ua mavae i nei lava mea o taaloga. Ua tele lava tausaga o

fai nei taaloga, e pei o afeleti, volipolo, netipolo, lakapi ta'ito'afitu ma nisi, e pei o kirikiti Samoa, o le soka, table tennis, ma le tosoga maea. E iai le taimi ou te manatua ua fai si leva, sa fai ai tuuga o'a popo ma lalaga 'ato. Sa malaga foi i Tuasivi, Iva ma Salailua mo kirikiti Samoa. Ae sa faia i le malae o Malisi i Lotopa i le isi tausaga.

E le mafai ona misia nei taaloga ona o le fia lagolago pea i fuafuaga a le Ekalesia mo ana tupulaga. Ua tele se sao o nei taaloga, ua maua ai ni sui o Samoa i le tele o taaloga faavaomalo e tausinio ai, pei o afeleti, lakapi taitoafitu, volipolo ma le netipolo.

Faamanuia le Atua i le Susuga i le Faatonu o Autalavou ma A'oa'oga Kerisiano ma le ofisa. Manuia le tapua'iga a Tama o le Ekalesia, le pa'ia o le aufaigaluega, ma le loaloa o le Ekalesia i Samoa ma atunuu e mamao.

Limu Pitolua Samuelu FS,
EFKS Saoluafata.

O le Alofa Faaso o le Meaalofa mai le Atua

Ina ua tuua le lotu i le tasi Aso Sa, na fo'i ma le fiafia le tasi taule'ale'a i lona aiga, ma le tala i le manaia o le lauga a le latou faifeau. A o le mataupu sa faataua i le lauga - Ia alofa atu ma faaso atu. Aua o le Atua na alofa mai ma faaso mai ina ia ola le tagata.

Na valaaulia lenei taule'ale'a i se 'aiga tele, o le faamanatuga o le fitusefulu tausaga o se tasi

faaauau itulau e sosoo ai

A Page for Youth

ITULAU MO TUPULAGA TALAVOU

O le Alofa Faasoa o le Meaalofa mai le Atua

tina matua o le nuu. Ua tuai laitiiti atu le taule'ale'a, a ua faasolo ina le ofi le mea o fai ai le 'aiga. E lua potu oloo faaoga, ona e le tetele potu. E ulu atu le taule'ale'a i le potu muamua, ua matua tumu lava, leai se ofi. A o le 'aiga, e tasi le sipuni tele toe umi. E tuu iai mea'ai ae faasolo le sipuni, ia oo i tagata uma o iai.

Sa le lagona se mea i le pisapisao ma le vevesi ona oloo naunau mai tagata i le sipuni tele lea e pasi atu ai le taumafataga. Tau saili atu se avanoa o le taule'ale'a lea i le potu e sosoo ai, maua ai lona nofoa ma nofo ifo loa.

O se vaaiga manaia sa ia vaaia i le potu lenei. E leai se pisa tele, e leai se vevesi, ae to'a filemu, ma fesoasoani atu le isi i le isi. A tuai ona oo atu le sipuni o taumafa i le la itu, ua pasi atu e

le isi tagata meaai i le isi. E pei ua fafaga e le isi le isi.

Fai mai le taule'ale'a i lona loto: O le mea tonu a lea na lauga ai lo matou faifeau i le Aso Sa. O le ola faasoa atu, ma le alofa atu i le isi uso.

A maua e se aulotu le agaga lea, o se aulotu fiafia ma le maopoopo. Fetalai Iesu i le tiapolo ina ua faaosooso atu e faaliu areto maa - 'E le na o mea'ai e ola ai le tagata.'

Le 'au faitau ma le pa'ia o le Ekalesia, o se ata manino foi lea o lou soifua foa'i mo le Atua e ala i lana galuega o tatou galulue ai e atiina'e. A oo ina goto ifo i le fatu ma le loto Afioga a le Atua, e uiga i le foa'i ua atoatoa, ona faigofie lea ona tatou talia ma faia e pei ona ia faailoa mai.

Ina ua sauni se galuega o le falesa o le tasi aulotu, sa tau saili ni tupe ma ni mea e fai ai le galuega. Na taoto i lona moega le tasi teine pe valu poo le sefulu tausaga o le a moe, ae tau ane lona mafaufau i le

talanoaga a ona matua e uiga i se falesa o fia fai, ae leai ni mea e faatino ai. Ala a'e i le taeao lenei teine, tau atu lana vaai i nai piliki pe ono pe fitu oloo taatitia mai i autafa o lo latou fale. Tupu ifo se manatu i le teine o le a ou alu e ave piliki nei, e fai ma sao i le galuega a le aulotu.

O lenei teine laitiiti e aoga i le vasega feoloolo o le A'oga Aso Sa. E masani foi ona faalogo i lona faiaoga i le mataupu lava lenei o le ola foa'i o le meaalofa mai le Atua. Ina ua iloa e le komiti o le galuega lenei fesoasoani a le teine o le A'oga Aso Sa, sa amata ai loa ona faavae le galuega ma saili tupe, ma ua maua mea e faaauau ai se'i oo ina mae'a. Faafetai tamaitai i lau faasoa. Ua e amata mea i le galuega a lau aulotu.

E fia maua ni tama ma ni teine faapea i totonu o aulotu. Ia e manuia, fai oe ma teine poto i le lumana'i. O le faamanuia lea a le faifeau o le aulotu i lenei teine alofa, ma loto Ekalesia.

Limu Samuelu FS
EFKS Saoluafata

Ua fai ona Apa'au ma Felelei ai Faatasi ma isi Agelu

faaauau mai le itulaue 11
ua i le lagi. Ua fai ona 'apa'au, ma isi mea. ma o le la ua felelei faatasi ma isi agelu."

Na ou 'ata'ata i lo'u faalogo atu i "apa'au ma isi mea", ma ou maofa i le faatuatua ma talitonu o lenei tamaitiiti laitiiti. Ma ou tuu fesili ai i lo'u fo'i

faatuatua ititi. A o o'u laitiiti sa ou sailiili ina ia ou savali latalata i le Alii. Ae mata e mafai ona ou lavatia se mea ogaoga faapea, poo se ma'i faigata, i lo'u olaga?

Faato'a ou maua le tali i le fesili lea ina ua te'a ni tausaga se lima. O se falema'i foi, ae le o a'u o se tausima'i i lea taimi, ae ua ou iai i le falema'i ina o le a ou fanau. O le tafa o ata o le aso fou na ou fanau ai, o se tama. Na matua faatumuina au i le fiafia. Peitai

na vave lava ona suia i le faanoanoa ina ua ou iloa e iai se mea e faaletonu i la'u pepe. E le tau moomia se poto faa-tausima'i e iloa ai e iai se mea e matua faaletonu lava i la'u pepe.

Na ou fesili i le foma'i, "E iai se mea e faaletonu i la'u tama?" Na ona sii faalatalata mai ia a'u e le teine tausima'i la'u tama se'i ou vaai iai, ona toe faavave ese ai lea i se isi potu. Tala fesili ma tala na fai, te'a aso e lua, faato'a toe sau ai le foma'i ma

silasila itulau e 14

‘U’ulima ma Milimili

faaauau mai le itulau muamua

fale’aiga i le aai o Niu Ioka. E oo i le manogi o meaai ua le mafai ona tosina iai o ma mafaufau ona o lo ma talanoa fiafia ma fe’enea’i. Ua ta’atitia ai lava ipu meaai ma sasala ai le manogi o le kuka a le fale’aiga. Na oo le ma talanoaga fiafia i le taimi na amata musu ai Mikaele e toe ta’u o ia o Maiki, a ia faaigoa sa’o o ia o Mikaele. Poo le tusa lea o le 12 poo le 14 o ona tausaga. Na te manatua na maligi ai loimata o si ona tina ma faapea ane, “E e! Si a’u tama e, matua e vave matua tele! Ua e le toe fia Maiki.”

Na ou tala ia Mikaele e uiga i aso sa masani ai ona ma o ma lo’u uso ma te tafafao i o ma tausoga ia latou faato’aga vine e fai ai le uaina. E masani ona ou matua ‘ai vine ai lava, ona fai mai lea o le uso o lo’u tina, se’i vaai i te’i ua tiga lou manava i lou ‘ai vine.

Na oo ina faasolo la’u vaai i le fale’aiga, ma ou tau atu ai i se ulugalii matutua ua ulusina, o nonofo i se isi laulau i le isi itu o le fale’aiga. O le loomatua e lanu solosolo lona ofu ua matafi ona lanu i le tuai, oloo faalagolago le isi ona lima i luga o le faalagolago o se nofoa ua matafi foi lona lanu. O le tumua’i o le ulu o le toeaina e matua ‘i’ila i le leai o ni lauulu o iai. O le tama’i ‘ato a le loomatua ua matafi foi lona tino i le leva poo ua fia ni tausaga. O le ‘ai a le loomatua, e

lamulamu lemu ana mama e pei o se mea mamafa ia te ia. A o le mea na ala ai ona tosina iai lo’u mafaufau, ona o le nofonofo le pisa o le ulugalii, e le talanoa, e nofonofo lava e leai ni a la tala. O tagata e pei ua leai ni mea e fiafia iai ona ua pulapula-a-lagoto o la soifua. Ua le fetau le lalolagi talavou mo la’ua. Na ou mafaufau, matua leaga tele! Ua matua leai lava ni a la tala o totoe e fai. Ua matutua tele! Tafefe pe a ma oo iai ma Mikaele i lea tulaga.

Na totogi a ma ‘aiga ma ma savavali loa o le a ma o ese ma le fale’aiga. Na ma ui atu i tafatafa o le ulugalii matutua. Na pa’u tonu lava la’u ‘ato i le mea o nonofo ai le toeaina ma le loomatua. Na ou punou ifo i lalo e aumai la’u ‘ato, ae ou iloa

Ua fai ona Apa’au ma Felelei ai Faatasi ma isi Agelu

fai mai: Ua mae’a su’esu’ega ma ua maua ai, e na o ni nai itula e ola ai la’u tama. E le mafai e lona tino ona tatali le ma’i ua pisia ai.

I lo’u mafaufau, ua te’a le taimi mo se faamoemoe, a ua oo mai le taimi e faatalitali ai mo lona oti. A o lea lagona na tulai mai e le ona o lo’u atuatuva, ae o le to’afilemu o lo’u loto.

E le’i umi, ae oti la ma tama ma lo’u toalua o Siaka. Ona

atu ai, le ‘u’ulima o le toeaina ma le loomatua, lomilomi ma milimili lima i lalo o le laulau, e leai ni a la tala, ae o lea e talanoa i o la lima. Lomilomi atu e le isi le isi; ae milimili mai foi e le isi le isi, i lalo o le laulau, e le iloa atu e se isi.

Na ou tu i luga ma la’u fuifuiki, Na ou lagona le maasiasi ona o o’u lagona sa iai muamua ona o le le talanoa o le ulugalii. Ae sa ma pisa lava ma ma fe’enea’i. A o le ulugalii, e leai so la pisa, ae sa femilimilia’i, felomilomia’i, i lalo o le laulau. Ma toe ‘u’ulima, e le iloa atu e se isi.

Na ou mafaufau a o ma savavali i fafo, ai se manaia pe a ma faapea ma Mikaele pe a oo ina ma matutua ma ulusina, i le pulapula-a-la-goto o le soifuaga. ‘Ai se manaia pe a ma savavali ma ‘u’ulima aga’i i le tauafiafi o le olaga! Pei o le toeaina ma le loomatua.

tusia e Daphna Renan

faamatalaina e

Afemata T. Apelu Aiavao

faato’a aumai ai lea ou te siina.

Ona faato’a masaa mai ai loa lea o loimata. I aso ua te’a ou te le’i lagona lavas se allofa faapea e pei o le mea lea ua oo ia te a’u, alofa o le tina i sana tama faato’a fanau mai, a ua toe oti atu. Faato’a ou malamalama lea i le uiga o le mea e ta’u o le loto nutimomomo. Peitai na tauala mai i o’u loimata maligi le alofa o le Atua, na ia aumai le filemu ma le malosia ia te au.

O se taimi o le aso na oti ai la’u tama, ma ou siisiia ma ou tagi, na ou manatua ai le tamaititi lea sa nofonofo i le faasitepu i le falema’i. Na ou

faaauau itulau e 18

O LE FAIFE'AU

mai le itulau muamua

1. Faatomuaga: Ina ua gapa le Taua Lonolua o le Lalolagi, na matua lologo soo se tulimanu o Peretania a o faasalalauina e le uaealesi tuusa'o mai le Maota o le Malo i Lonetona, le lauga faamomoi loto ma faamalosi'au a le alii palemia o Winston Churchill. Sa ia lapata'ia le atunuu atoa, ia nofo sauni i le toto masaa, o le fatuatia, o le uio ma le afuliligi (blood, toil, tears, sweat). Fai mai a ia:| "Tatou te tau ma le fili i le sami, tatou te tau fo'i i le laueleele, tatou te tau i le vateatea, tatou te tau lava i soo se mea."

E faapena le agaga o tima'iga ma apoapoa'iga nei a Iesu, i to'atuga o le galuega o le a fetai'a i ma le **"Auina atu o lona Ausoo filifilia"**. E le milimilia faau'u. Ae tumu i tiga. Ui lava la e le o se suesuega auiliili i le Mataio e 10 oloo fa'a'au i ienei pepa, a o iina i le mataupu atoa, oloo faamanino mai ai e Iesu le vao lu'itau ogaoga o le galuega tala'i e feagai pea ma le Ausoo filifilia o na ona po. Faapea le afaigaluega faifeau o nei aso.

Afai la o le galuega a le faifeau e pei o mamoe i le va o luko, o lona uiga e nofo i falagatete lona faafoeina. Aua o le masepu lava, gagali e le luko (tulou). Pe faasaga i sisifo poo sasa'e, e luko loaloa lana vaai. Peitai o le fetalaiga a Iesu, 'Ia outou atamamai e pei o gata, a ia filemu pei o lupe, o le tali lea mo soo se faifeau. (O se taimi ona auiliili lea iai o se lagona).

2. Vaaiga Lautele

O le a muamua ona aga'i se manatu i le natura o le galuega a le faifeau, tuu faafeagai ma le vaai iai o tagata lotu. O se taumafaiga ia silafia ai nisi o mea oloo faitioina ai le faifeau ma lana galuega i nei aso. E ui o le galuega a le faifeau e tumu i mea e faamalieina ai, ae iai foi ma mea e sili ona faigata ma le matuitui e faatupu faanoanoa. O mea e alu ai lona malosi ma faava'atu'ia ai lona fia taumafai.

E le na o le galuega o le Lauga - poo sauniga o maliu, saofa'i, faaipoipoga, lotu faamanatu ma isi. Ae faapena fo'i i le tusiga o reference ma ripoti mo probation (Ofisa Vaavaaia), sauniga faa-Pulega ma faa-Matagaluega. O faigalotu faalemalo atoa ma le auai i Komiti Eeseese a le Ekalesia. O A'oga a le Faifeau, A'oga Aso Sa, Autalavou, Au Leoleo, Au Taumafai, Pre-School, Lotu Tamaiti ma Papatisoga, Lotu Aso Lulu. Ma e le pau ia o mea e alu ai le malosi o le faifeau. O le vaivai o le tino ma le vaivai faale-maufaufau, e vave tele le oo iai ona o fesootaiga ua le lelei ma nisi o lana aulotu. A oo ina le femalamalamaa'i ma tupu ai le tetee i mea oloo eseese ai, o se tulaga faigata lea i le faifeau. E lagona ai lona lelava, ma lona le atoatoa e faamalieina ai i latou oloo ia alofa tele iai. E faanoanoa foi i le tetee a e oloo ia faalagolago iai mo fesoasoani. Ma o tulaga faapena e sisii ai ona lima i nisi taimi.

Ua ou iloa i nisi o Ekalesia, e foliga e leai lava se mea e sa'o

e fai e le faifeau. Poo le a lona faamaoni i le faiga o lana galuega, ma lona tauivi malosi ia sologa lelei pea, e iai lava nisi o lana aulotu e saua i taimi uma, e faitio ma saili masei i le faifeau.

E iai se tasi oloo faamatalaina faapea lagona o le faitio o tagata i le faifeau:

i. A talavou le faifeau, ona faapea lea, e leai sona potomanasani, e tautalaitiiti. Ae a sina uma lona lauulu, ona faapea lea, ua sau e penisione mai iinei, e le aoga mo tupulaga a le nuu.

ii. A to'afitu pe sili atu le fanau a le faifeau, ona faapea lea, anusa le vave pe o le moli, ailoga e amio Atua? Ae a leai fo'i se fanau ona faapea lea, o le mala, ua ia aumai se faata'itai'ga leaga.

iii. A aga'i o ia i le au vaivai o le Ekalesia ona faapea lea, o le fia iloa e mafua ai. Ae a aga'i foi i le au maumea, ona faapea lea, o le fia tele o le meaola le taulia (tulou).

iv. A lauga mai i se pepa saunia lelei, ona faapea lea, o le tauloto le mea o fai mai nei. Ae a leai se pepa, ona faapea lea, e le malamalama, fua i le sasa solo.

v. A le fagagaina le faifeau, ona faapea lea, e le afaina oloo *diet*. Ae a tele meaai e la'u i le faifeau, ona faapea lea, to'aga e fafaga ia ma'i, ma vave oti atu ai.

vi. A taia lelei le lauga i le autu o le Tusi Faitau Aso, ae fai mai ua faatatau ia te ai le lauga. Ae a ese se autu mai le Tusi Faitau Aso, tusa pe 'anoa se lauga, ae fai mai, o le mea ua mafu (tulou), e le saunia le

faaauau itulau e 16

O LE FAIFE'AU

faifeau.

vii. A tele tala faatusa o lana lauga, ona faapea lea ua na le faataua le Tusi Paia. Ae a leai ni tala faatusa ona faapea foi lea, ua fenumia'i lana mataupu.

viii. A tetee o ia i le leaga, ona faapea lea ua itaita gofie, ae a tuufau i le leaga, ona faapea lea ua taumafai e faamalie itu e lua.

ix. A faatau e le faifeau meafale fou poo ipu o le sefe, ae fai mai o le alai. Ae a tau leai ni ipu ona o le ave e le aulotu, ma gau'i meafale, ona faapea lea, ua la'u e le faifeau i lona aiga.

x. A fealua'i le faifeau i le taavale tuai, ona faapea lea, a o fea tupe o le Alofa, ua ia faaluma le aulotu. Ae a faatau se taavale fou, ona faapea foi lea, ua ia faatauga le afu o le nuu i mea a le lalolagi.

xi. A le mafaia e le faifeau ona faamalie tagata uma, ona faapea lea, ua ia faamanu'a le aulotu, ua tataua ona alu ese. Ae afai na te faafiafia tagata uma, ona faapea foi lea, o le fia lelei, e leiloa poo fea le mea e talitonu iai.

xii A lauga o ia i Aso Sa uma, ona faapea lea, ua le lava faalogo i le tagata e toatasi. Ae a ia valaau i nisi faifeau e asi mai, ona faapea foi lea, ua solomuli i lana galuega ma ua faatigaina le aulotu.

E mafai lava ona faapea se tasi, ua soona faatele lava nei manatu, ae le moni atoatoa. Ae ou te fai atu, e leai. O nei manatu, (ma le tele e le o aofia i lenei pepa) e agai i se vaaiga lautele i vaega eseese o le

galuega faa-faifeau, ma le tali mai iai o nisi i le Ekalesia.

Poo fea lava le aulotu o e faifeau ai, e iai lava i latou e faapena la latou vaai i le faifeau, o le vaai faa-luko i le mamoe. O le vaai e fia lalamu (tulou). A oo foi ina malolo le faifeau, e iai nisi e anau mo se fonofono e lauiliu ai le toe taliu mai o le faifeau pe leai. E le'i tupu ia te a'u lea mea. Ae ou te faatali pea aua e ono tupu lava. Tatou iloa lelei aua e agiga i le savili, nisi aulotu (e le o tagata uma) ua leva ona mana'o e tuli le faifeau, ae faatali se'i malolo. E leai se faiga faapea sa iai muamua, ae ua tolu i nei aso. Ona e iai mea e le o aofia i lenei pepa ua soona aia iai le faifeau, ma le malamalama ai tagata i ana a'oa'oga.

'A 'e iloa oloo tau aliali mai ni tulaga faapea i lau aulotu, ma oloo faaleagaina ai le sologa lelei o le mafutaga faale-Ekalesia, ona e iloa lea, o le moni ma le faamaoni o le fetalaiga a Iesu i le Mataio 10:16: **"O lenei, ia outou atamamai pei o gata a ia ffilemu pei o lupe."**

3. Sini Autu:

Ou te talitonu e le nanananea se manatu pe a tuu eseese, pe faamatala na o se vaega o le lafoga lenei a Iesu: **"Ia outou atamamai pei o gata, a ia ffilemu pei o lupe."** Aisea? Ona oloo lagolago malosi ma opogi e le tasi manatu le isi, (Atamai/Filemu), ina ia faamautuina ai le agaga o lenei fuaitau atoa. O le uiga o lo'u manatu, **"Filemu"**, e moomia

tele i le galuega faa-soo. Ae le lava. Afai na o le filemu ae le galueaina le mafaufau, ua le aoga. Ae a filemu ma atamai, ona lelei lea ma mautu. E faapena foi pe afai na o le atamai ae leai se filemu. E taape le lafu mamoe, aua foi na o le vevesi lava lona taunuuga. E matua moomia lava le va'ava'alua o nei auupega taua mo le galuega faa-Tala Lelei, e pei ona lapata'ia ai le au soo.

4. Faamatalaga:

Fautuaga mo le Auaigaluega

O le mea moni e le faigofie le galuega a le Atua. E iai nisi latou te talia, ae iai foi nisi latou te teena. A o le itu sili ona leaga, ona e iai nisi e faifai mai, e faitio ma sau. O tulaga faigata ia o le galuega lea ua faatusaina ai e Iesu - "ia outou o e pei o mamoe i le va o luko." E le auina fua e Iesu ona soo, ae auina faatasi ma lana fautuaga e fesoasoani i le galuega. Ma e tolu itu taua oloo fia faailoa mai e Iesu i le Auaigaluega Faifeau.

i. Ia pei o Mamoe:

E le tau faamatalaina uiga o le mamoe. O le manu filemu, ae gau'i gofie, aemaise o lona usitai i le matai, poo fea lava e taitaiina ai o ia e le matai, e mulimuli lava, e leai se leo. Pe ta'ita'i i le lua ia pa'u, e pa'u lava. E le tetee, e le faafiti, e leai ni foliga ita pe musu, e alu lava i le vaa o faalolo. Atonu o le eseese lenei o le luko ma le mamoe, lea ua faatusaina ai e Iesu le mamoe i le va o luko; aua o luko e le gata e fe'ai, ae fai ma sola; e le faalataina e se tagata. O le manu e segisegi. A

faaauau itulau e sosoo ai

O LE FAIFE'AU

o le mamoe e le gata e filemu, ae le mafai ona sola. Aua e lata, ma pipii mai lona loto. O le mafuaaga lena o le saunoaga a Iesu. Ia outou pei o mamoe i le va o luko.

O se faamanatu lena mo le afaigaluega. Ia teu i loto, ua auina i tatou e le pei o se luko, poo se leona fo'i, a ia pei o mamoe, e le solomuli, pe faafiti ae usitai ma faalogo i lona Matai, o Iesu lea.

ii. Ia atamai e pei o le gata:

E toalua tagata, o le Moselemu ma le Kerisiano. Sa la talanoa i o la talitonuga. Ona faapea atu lea o le tagata Moselemu: O le a se mea e te faia e faaalua ai lou faatuatua ma lou alofa i lou Atua? Fai mai le tagata Kerisiano - Oi, ae a oe, o a mea e te faia e faaalua ai lou alofa i le Atua? Tali le Moselemu - "Ou te mafai ona ou oso i lalo o le mauga, nei lava, pe sapaia a'u e agelu pe leai, ae ou te oti lava mo lo'u Atua."

Fai mai le Kerisiano, "Ou te le mafaia ona ou faia lena mea, ona o le Atua oloo o'u tapua'i iai, e le finagalo o ia i faiga faavalevlea faapena. O le mea lena e te faia, e le o se foliga o lou alofa mo le Atua, ae o le faaaliga o lou faavalevlea." Ona 'ata lea o le Moselemu ma milimili lona 'auvae. E iai taimi i luga o le galuega, ua tatou manatu ua faaali o tatou alofa ma o tatou faatuatua, ae tutusa lelei ai i tatou ma le tagata Moselemu, lea ua fautua mai ai Iesu - "Ia outou atamamai e pei o le gata."

O uiga o le gata, ua ou aumaia

ai ni a'oa'oga se tolu, e aoga mo tatou le Afaigaluega Faifeau.

CAUTION: Ou te faauigaina le faifeau, ia fuafua lelei, mataala ma faaeteete, ia aua ne'i tula'i mai ni faafitauli ogaoga e lepetia ai se faamoemoe lelei. **CARE TAKEN TO AVOID DANGER.** O uiga lava ia o le gata, na te iloa atu lona fili ona lafi lea, e ese le poto i ana auala lililo ma ana togafiti e 'alo ai pe lafi pe malutia ai lona ola. O le upu oloo faaaogaina iinei o le (cunning), o le fai togafiti, lea e pei e leaga i se isi itu, ae mafai ona ta'ua "o uiga poto", e pei ona faia e le gata. E tele ana auala ma ana togafiti, na te puipua ai o ia mai le fili. O le tele o le afaina o le galuega, o tatou lava le afaigaluega, ona o le le fuafua lelei ma faaeteete, ae soona alu pei ua leai se tapasa. Ia e mataala ma atamai e pei o le gata.

BE SMART: O lona uiga o le faifeau e tataua ona ia silafia mea uma. E le gata i le mataupu silisili i le Tusi Paia, a o le poto salalau e aofia ai le tu ma le aganuu, ia silafia ma malamalama foi i le malo ma ona upufai, e oo lava i mea e tutupu i le lalolagi, aemaise foi, totonu o lona nuu. O le tele o mea na te silafia, e fesoasoani ai ia te ia i tapenaga mo lauga, aemaise i a'oa'oga e faia i Autalavou ma Aoga Aso Sa. O le mea moni e ala ona faaletonu tapenaga, ona e le o lava le malamalama i mea uma, ma e taua le silafia o mea uma.

Faafetai foi i le Mafutaga Faafouina i Malua, aua o le isi

lea faamoemoe taua e toe atia'e, toe fotua'i ma toe faafouina le afaigaluega aua le galuega. O le le lava o le iloa poo le silafia, o le tasi lea pogai e mafua ai ona le lelei tapenaga a le faifeau mo lana galuega. E ala ona tavi'o ma minoi le gata, ona ua ia iloa mea uma, ma fuafuaga, e tataua ona fai. Ma gaoioi loa i le mea e aga'i atu iai.

TACT: O auala, poo agavaa e momoli ai le feau. E moni ua tele le silafia i mataupu silisili i le Tusi Paia, a o le auala e faaaogaina e momoli ai, oloo tele ina vaivai ai. Tatou molimauina, e iai tagata lotu e momoe, ona o le le malamalama pe ua nunumi, ua le manino ia i latou le feau, masalo o le gagana oloo faaaogaina e loloto tele, pe maotua fo'i. Oloo molimauina foi nisi o le afaigaluega ma a latou auala e faaaogaina e momoli ai le upu, e talia gofie, ma malamalama gofie. E a pe a fesuisuia'i auala e faaaogaina i lea sauniga ma lea sauniga, i lo le tafatasi i le auala e tasi. Usu sau pese, pe faatino sina tala e le fanau e fetau ma le autu. Faa-Peretania nisi fuaitau faigofie mo le silafia o le talutalufou nanunanu, ina ia malamalama tagata uma.

Ae fa'a'ato'atoa mea uma i lau amio. Amio i lupe. Amio i mamoe ae atamai pei o le gata. Always keep a low profile.

Illustration: - (Poka a Sumeo) - O le faifeau ua alu e fai le lotu, ua fiu e nofonono i le falesa, ae na o le toatasi lava le tiakono. Na i'u ina tu le faifeau ma faapea atu i lana tiakono, "E sili pe a malolo ia le ta lotu, leaga na o oe." Fai mai le tiakono, "Faifeau, a e alu e

faaauau itulau e sosoo ai

O LE FAIFE'AU

fafaga au puaa, afai e tasi le puaa, pe te toe foi ma meaai e le fafagaina?" Tali le faifeau: "Ua lelei, o le a fai le ta lotu." Ona fai atoa lea o le lotu, usu pese, fai le tatalo, fai le lauga, na i'u ina moe le tiakono ona ua umi tele le lotu, ona faapea mai lea o le faifeau, "Na e fai mai foi e fai le ta lotu, a o lena ua e moe?" Tali le tiakono, "Lau Susuga i le Faifeau, afai e te fafagaina au puaa, e fua le aofa'i o popo i puaa, a o lau mea ua fai nei, ua saga la'u uma mai lava na popo ae na o le tasi le puaa. O le mea e sosoo, o le aupua'i." (Se'i tulou.)

iii. **Ia filemu e pei o le lupe**

O le filemu, i lona faaaogaina iinei, e mama (innocent), e leai sona pona. E ala ona tele tala a tagata, pe afai e le lelei uiga o le faifeau. E tolu ni upu ua aumaia e faamatalaina ai:

LEGAL: Ia aloa'ia au tapenapenaga, ia le feteena'i ma le aganuu, ia le feteena'i ma tulafono poo faavae o le Ekalesia. E ala ona tele

faamatalaga i le afaigaluega, ona ua soli tulafono. Faanoanoa ai i nei ona po, ona o nisi o Ekalesia poo le faifeau foi, ua oo i luma o le faamasinoga ma nisi o aiga ona o fanua ma suafa, poo nisi mafuaaga. O nisi lava aulotu, ua molia ona o le pisapisao ma aafia ai tuaoi.

ETHICAL: O au a'oa'oga ma mea uma e te faia, faapea au tusitusiga, e tatau ona taliagofie e tagata. E le gata i lena, a ia o faatasi ma lau amio. Ia tauseaafia, amio solia, tauagafau, o lau gagana, ma ou la'ei. Tasi lea o tatou vaivaiga, tatou te faatamala (careless). O le upu tatou te masani ai: "E leo tele galuega, ae le o upu." E iloa le tamalii i ona uiga. A lelei o tatou uiga ma amioga, o le ta lauga lena i lea aso ma lea aso.

RESPECTFUL: Ia iloa e le faifeau le va fealoa'i. O le mea moni, o tagata e faaaloalo i le faifeau.. E tatau foi i le faifeau ona faaaloalo i tagata.

O le natura lea o tatou o e ua

o iai. E ui sa iai pea le faanoanoa, ae sa iai foi ma le filemu ma le malosi. Sa ou manatua pea lesona lelei na ou maua mai i tamaiti e toalua - lea sa nofonofo i le faasitepu, ma lea na ou fanauina mai, ae vave ona oti. Ou te le ofo foi i le tele o so'u faatuatua, ae ou te ofo i le tele o le alofa o le Atua mo a'u. Ma o le talitonuga lea na faavae ai ma ta'ita'iina ai lo'u olaga mulimuli ane ai.

fai ma ta'ita'i, tatou te mananao ia faaaloalo mai tagata ia i tatou, a o tatou, ua tau leai se faaaloalo atu. Tasi lenei vaega taua e tatau ona faamalosi i le galuega a le Atua, aemaise olaga o a tatou fanau, e o gatasi le usitai ma le faaaloalo, ma la tatou tu ma le aganuu. O le iloa o le va fealoa'i, o le solo lelei lea, ma le manuia o le galuega, pe a tatou tausi i le va nonofo ai ma tagata.

Ua tatou iloa i nei ona po o le tele o mea ua tutupu, ona ua leai se va fealoa'i ma le va tapuia. Ia atagia i o ta olaga le faaaloalo, i lau gagana, o ou foliga vaaia, o au gaoioiga; poo a ta amio ma uiga, i le va ma tagata. O le faifeau, e tatau ona faia le galuega a le Atua i le ava ma le faaaloalo ma le migao e tatau ai.

Ou te talitonu, o le agaga lena na faapea atu ai Iesu i ona soo: "Ia outou atamamai e pei o gata, ia fifelema e pei o lupe."

Ou te taofi, e eseese lava finagalo e uiga i le galuega a le Atua, a o se fautuaga vaivai e mafai ona fesoasoani ai i le galuega a le Atua. E le na o faifeau, a o tatou uma e fai ma soo..

Whose House!

My family is close friends with another family who faithfully attends church. Often we spend Sunday afternoon together relaxing at our house. Recently when I phoned our friends, their four-year-old daughter Alicia, answered and politely asked who was calling. To tease her, I said kiddingly, "Alicia you come to my house almost every Sunday and you don't know who I am?" In a reverential voice she replied breathlessly, "Jesus?"

Ua fai ona Apa'au ma Felelei ai Faatasi ma isi Agelu

mai le itulau e 14

manatua ana upu na fai mai ia a'u: "Ua fai ona apa'au ma felelei ai faatasi ma isi agelu. Na ou memumemu ma ou fai atu i la'u tama ua oti: "E leai se mea o iai. O lea ua faatasi ma Iesu. Ma e ou te toe vaai iai i se aso."

Ma e moni lava, e leai se mea

O E U A M A L I L I U

Fasia Penisula

Tuanu

17 Aperila 1954-13 Fepuari 2014

O le faletua o le faifeau Orakei i Niu Sila. O ona matua, o le tama o Sefuiva Ioane, a o lona tina o Pelenatete Ta'au Godinet.

Na fanau i le aso 17 Aperila 1954 ae na faamanavaina ana galuega i le aso 13 Fepuari 2014. Ua 59 tausaga o lona soifua.

Na faaipoipo atu ia Penisula Tuanu i le aso 31 Ianuari 1976. E toa sefulu le la fanau e toatolu ua maliliu ae to'afitu oloo ola.

Na ulufale i Malua ma lona alii i le 2004 ma faaiuina le taumafai i le 2007. Na valaau mai iai le aulotu i Orakei i Niu Sila, pulega a Maugakiekie i le 2008 ae osi le feagaiga i le aso 3 Iulai 2009 ma galulue ai loa seia faamanavaina ana feau e le Atua.

Ua lima tausaga o le la galuega faafaifeau ae maliu loa le tina. Ua leva ona feagai le tina ma le ma'i o le suka. O se tina finau, tauivi ma taumafai. E fiafia i le galuega e pei ona valaauina ai i laua. E agamalu toe faaloalo i le afaigaluega na muamua.

Na vaaia ona foliga malosi a o le tino ua vaivai. Na po'ia i ma'i ma siitia ai i le maota gasegase i Middlemore mo togafitiga a alii ma tamaitai fomai. Sa faasolo ina manuia ma toe te'a i lona aiga i Mangere.

Na faafuasei ona puni lana

manava i le afiafi o le Aso Sa 9 o Fepuari ma nati atu ai loa i le falemai ma toe maua ai le mavana. Peitai ua na ona manava lava a ua le toe iloa se mea. Sa talosaga loa matou te o i lo matou aiga ina ua ta'u mai ua le toe iai se togafiti e fai iai. Sa matou o loa i tua i lo matou aiga i Mangere. O le vaveao o le AsoTofi 13 Fepuari i le lima minute e te'a ai le ono na uma filemu ai lona ola.

O lona sauniga faale-aiga na faia i le aso 19 Fepuari 2014 i le malumalu EFKS Panmure oloo galue ai le Toeaina Rev. Pouniu Faamausili ma le faletua ia Aniva Faamausili. Sa taitai le Susuga i le Toeaina o le Pulega Rev. Pouniu Faamausili. O le folafolaina o Afioga pa'ia a le Atua o le Susuga i le Faafeagaiga Rev. Iosefa Tiata; o tatalo o le Susuga i le Faafeagaiga ia Maone Leausa. O le upu faamafanafana o le Susuga i le Faafeagaiga Rev. Alesana Afamasaga, o le Faafeagaiga o le alalafaga o Lefagaoolii o le nuu o Fasia.

Na molimau le fanau i le latou mafutaga ma le tina. Na molimau foi sui o lona aiga, o le Susuga i le faifeau o Siaki Lilo Iosefo o le atalii o lona tuagane. Na molimau le tama o Fuimaono Salapo Falealilo le atalii o le uso o lona tama (Fasia) e fai ma sui o le aiga o lona tama.

O lona toe sauniga na faia i le malumalu EFKS Panmure. Sa taitai lava le Susuga i le Toeaina Rev. Pouniu Faamausili. O le Susuga i le Failautusi o le Matagaluega Aukilani na

fofogaina le tatalo, le Susuga Rev. Iatua Mulu. O le fofogaina o le Afioga pa'ia a le Atua o le Susuga Rev. Alesana Afamasaga. O le laugaina o le Upu o le Susuga ia Rev. Misikopa Loli. Na faaopoopo iai le Toeaina.

Na molimau le teine matua o le fanau i le toe sauniga ma le molimau autu a le Susuga i le tama faifeau Rev. Penisula Tuanu e tusa ai o le la mafutaga.

O le loto lava o le tina o le galuega. E ui ina vaivai lona tino ona o ma'i, a o se tina lotu tele, e malosi lona lotu mo le galuega. E finau i mea lelei mo le galuega ina ia tupu ma ola. O ana tala malie e fai i le aulotu e faatupu malosi i se galuega e feagai ma le aulotu.

O le Aso Toona'i 8 Fepuari na faaipoipo ai le tamaitai o Pua o le uii lea o le fanau. Sa faailoa lona fiafia i lana siva faataamilomilo, 'ai lava o nai ona toe saafiafia ia. O le aso Sa 9 Fepuari na faafuasei ai ona pogisa lona lalolagi ma le toe iloa ai se mea, ma ave ai loa i le falemai toe te'a mai i lona aiga, se'i oo ina maliu ai i le vaveao o le AsoTofi.

O le Susuga i le Toeaina Rev. Pouniu Faamausili sa ta'ita'ia ona toe sauniga i le tuugamau, ma faamavae atu ai i le pese faatofa a le Au Kerisiano. Tofa tina. Manuia lau malaga.

Rev. Penisula Tuanu
EFKS Orakei.

O E UA MALILIU

Apulu Eti Vaeau

12 Mati 1962 - 22 Iuni 2014



Apulu Eti Vaeau

12 Mati 1962 - 22 Iuni 2014

O le tiakono EFKS Alafua. Na soifua mai i le aso 12 Mati 1962, ae maliu 22 Iuni 2014, tusa ua 52 tausaga tolu masina ma aso e 10 le matua o lona soifua.

O lona faletua o Pua Mata'utia, o le lua ai lea o ona faletua. Faletua muamua o Sesilia Ulugia e to'afa le fanau. O Pua le toalua lona lua e toalua le fanau. O ona matua o Fanene Faalia Vaeau lona tama, a o Pua Moeva Vaeau le tina. O ona uso ma tuafafine e to'a sefulu. Sa a'oa'oina Apulu i Vaimoso Primary, ma Levaula College.

O lana galuega o le ave taavale, ma le fai pisinisi. Sa galue muamua i le Matagaluega o le Soifua Maloloina, e maliu nei o galue i le EPC.

O Apulu Eti e le se tagata e matua atoatoa lona malosia e pei o le toatele, ae ese le tauivi o Apulu ma ona gasegase. E agamalu ma to'afilemu ona uiga, e foliga fiafia i le tele o taimi, ma agamalie, e tausua ma 'ata ai i le tele o taimi.

O molimau i le soifua o Eti a o tama talavou, e le se tagata lelei. Peitai ina ua ia maua Keriso, ona suia ai lea o lona tagata tuai e fai ma tagata fou. Fai mai Paulo - "O le ua ia Keriso o le tagata fou ia, ua mavae mea tuai, a ua faafouina

mea uma." "Ua le toe ola au, a o Keriso oloo ola i totonu....."

Na faa-ekalesiaina Apulu Eti i le tausaga e 2010, ae faae'etia i le tofi tiakono i le 2012. Sa fai lo la matafale ia Mati 2014. Na molimauina le to'a'aga mai o le aiga o Apulu ma Pua o tapua'iga, ma mea e fai a le aulotu, e ui ina mamao Moamo, leai se taavale, o le taxi lava e o mai ai i taimi uma, ae faamalolosi mai lava. E usu po mai e aumai Eti laitiiti i le A'oga Aso Sa i le 7.30am, ma nonofo ai i le lotu e amata i le 9am.

E ese le fiafia i lona tofi tiakono e sauniuni iai pe a oo i lona masina e tautu ai, e tofi e le Taitai e tatalo, faitau Tusi Paia. O lana tala ia te au, o taeao o aso faigaluega, e ta loa le 5am, savali mai loa mai Moamo i Vaitele i le ofisa o le EPC, piki lana taavale, toe foi i le fale, sauni, fai lana ti, inu fualaau amata le aso.

O lona sauniga faaleaiga na faia i le faga'ena o Lugaliga i Leifiifi i le 4pm i le afiafi o le Aso Gafua 30 Iuni 2014. O le Susuga ia Amosa Reupena na taitai, ma faifeau o lo latou aiga.

O lona toe sauniga o le Aso Lua 1/7/14 i le 10am i le malumalu EFKS i Alafua. O a'u na taitai, o le faifeau o Tanuri Pesaeli FS na avea i totonu le sa o Apulu i le malumalu mo ona sauniga ma faitau Tusi Paia.

O molimau o Pua lona faletua, o Nuusolia lona atalii, Fanene Vaeau lona tama, ma le molimau a le faifeau, o au. O le talosaga o Peteru Seiuli FS. O le lauga o Asalele Lefauaitu, faifeau Metotisi. Faaopopo le taitai, faaii lona toe sauniga i lona aiga i Moamo ma lagomau ai. O la Paulo, "E le o toe ola au, a o Keriso oloo ola i totonu ia te au."

Tofa Apulu Eti Vae'au!
Tavita Anesone FT.

Fasia Penisula Tuaniu

17 Aperila 1954-13 Fepuari 2014



O Monike e To'alua

E toalua monike na o malaga e asiasi i le nuu pa'ia. Na taunuu atu le la malaga i le vaega o le ala e asa ai i le vaiatafe. Na la iloa atu se teine lalelei o feosofa'i mai i le auvai o le vaiatafe, ma lona faaletonu pe a faapefea ona ia laasia le vaiatafe ona e loloto, ae o lea e ofu ona ofu lelei e musu e susu i le vaiatafe.

E le'i umi lava ae oso atu loa le isi o monike nei, ua fafa le teine ma savali ma laasia le vaiatafe loloto, ave le teine ua tuu i le isi itu o le vai.

Ona faaauau ai lea o le malaga a monike. Pe tusa o le itula talu ona savavali ma le le pisa monike, ae faapea loa le fesili a le monike lea na te le'i fafaina le teine, "E te manatua e sa se isi ona pa'i i se tamaitai i nofoaga faitele? E sa i tulafono ona fepa'ia'i se tamaloa ma se tama'ita'i i nofoaga faitele. O le a nei sau tala a fai o lea ua e solia tulafono o le ola faa-monike?"

Sa savali pea ma le le gagana le monike lea na amoina le teine. Ae na iu lava ina tali ane e faapea, "Ua fia nei itula talu ona ou tuu i lalo le teine i le auvai o le vaiatafe, ae o lenei lava e te amoina i lou mafafau. O lea lava e te mafafau iai i le teine? A o a'u, ou te le o toe mafafau iai."